

欽定古今圖書集成

曆象彙編乾象典



欽定古今圖書集成曆象彙編乾象典

第九十一卷目錄

雪部藝文四 詞

望遠行 詠雪

白苧 雪

江城子 大雪懷朱康叔

滿庭芳 雪中戲呈友人

驀山溪 采石值雪

浣溪沙 新春微雪

宋柳永

前人

蘇軾

黃庭堅

李之儀

毛滂

滿江紅 催雪

周紫芝

女冠子 雪

周邦彥

紅林擒近 雪二首

前人

前調

前人

昭君怨 雪

韓駒

青玉案 詠雪

陳瓘

江城子 大雪與客登極目亭

葉夢得

朝中措 雪景

張掄

醜奴兒令 詠雪

康與之

水龍吟 雪景

楊无咎

朝中措 建康大雪

侯寘

鷓鴣天 和趙文鼎賦雪

辛棄疾

滿江紅 雪霽

前人

念奴嬌 韓南澗載酒過雲樓觀雪

前人

水調歌頭 和王政之吳江觀雪

前人

減字木蘭花 雪

范成大

清平樂 詠雪

程垓

謁金門 春雪

韓元吉



水龍吟

雪

管鑑

喜遷鶯

雪

王千秋

風流子

雪

前人

賀新郎

姑蘇臺  
觀雪

盧祖臯

水龍吟

雪

史達祖

東風第一枝

春雪

前人

徵招

雪

趙以夫

一翦梅

客中  
新雪

方岳

念奴嬌

夢雪

前人

紅林擒近

雪次周美  
成韻二首

方千里

前調

前人

前調

前題

楊澤民

前調

前人

洞仙歌

雪

沈端節

掃花遊

春雪

吳文英

無悶

催雪

前人

紅林擒近

雪次周美  
成韻二首

陳允平

前調

前人



六么令

雪

周密

前調

春雪

前人

聲聲慢

催雪

王沂孫

無悶

雪意

前人

柳梢青

清明夜雪

張炎

探春慢

雪霽

前人

摸魚兒

春雪客中寄友

前人

念奴嬌

雪

姚勉

驀山溪

雪二首

何夢桂

前調

前人

念奴嬌

催雪

朱淑真

前調

殘雪

前人

清平樂

雪

孫道綸

歸朝歡

對雪追和東坡

無名氏

青玉案

雪

金完顏璫

滿江紅

詠雪

元李俊民

選冠子

對雪

張翥

前調

歲晚再用前韻

前人

瑤華

雪

張雨

如夢令

春雪

明楊基

摸魚兒

斷橋殘雪

瞿佑

蝶戀花

斷橋殘雪

莫璠

望江南

雪

楊慎

漁家傲

冬雪

吳子孝

前調

前人

歸朝歡

春雪

前人

多麗

晚春雪景

王世貞

未遇樂

書懷

馮琦

點絳脣

題雪圖

施紹莘

青玉案

山林積雪

李伊玉

雪部選句



乾象典第九十一卷

雪部藝文四 詞

望遠行 詠雪

宋柳耒

長空降瑞寒空剪浙浙瑤華初下亂飄僧舍密灑歌  
樓迤邐漸迷鴛瓦好是漁人披得一蓑歸去江上晚  
來堪畫滿長安高却旗亭酒價 幽雅乘興最宜訪  
戴泛小棹越溪瀟灑皓鶴奪鮮白鷗失素千里廣鋪  
寒野須信幽蘭歌斷同雲收盡別有瑤臺瓊樹放一  
輪明月交光清夜



白苧

雪

前人

繡簾垂畫堂悄寒風浙瀝遙天萬里黯淡同雲幕  
簾漸紛紛六花零亂散空碧姑射宴瑤池把碎玉零珠  
拋擲林巒望中高下瓊瑤一色巖子陵釣臺歸路迷  
蹤跡 追惜燕然畫角寶籥珊瑚是時丞相虛作銀  
城換得當此際偏宜訪袁安宅醺醺醉了任金釵舞  
困玉壺傾側又是東君暗遣花神先報南國昨夜江  
梅漏泄春消息

江城子

大雪懷  
朱康叔

蘇軾

黃昏猶是雨纖纖曉開簾欲平檐江闊天低無處認  
青帘孤坐凍吟誰伴我指病目撚衰髯 使君留客  
醉厭厭水晶鹽為誰甜手把梅花東望憶陶潛雪似  
故人人似雪雖可愛有人嫌

滿庭芳

雪中戲  
呈友人

黃庭堅

風力驅寒雲容呈瑞曉來到處花飛徧裝瓊樹春意  
到南枝便是漁蓑舊畫綸竿重橫玉低垂今宵裏香  
閨邃館幽賞事偏宜 風流金馬客歌鬢醉擁烏帽  
斜敲問人間何處鵬運天池且共周郎按曲音微誤



古今圖書集成  
首已先迴同心事丹山路穩長伴綵鸞歸

驀山溪

采石  
值雪

李之儀

蛾眉亭上今日交冬至已報一陽生更佳雪因時呈  
瑞勻飛密舞都是散天花山不見水如山渾在冰壺  
裏平生選勝到此非容易弄月與燃犀漫勞神徒  
能驚世爭如此際天意巧相符須痛飲慶難逢莫訴  
厭厭醉

浣溪沙

新春  
微雪

毛滂

謝女清吟壓郢樓樓前風轉柳花毬學成舞態却多

羞半落瓊瑤天又惜稍侵桃李蝶應愁酒家先當  
翠雲裘

滿江紅

催雪

周紫芝

寂寂江天雪又滿晚來風急空懊恨散鹽飛絮未成  
輕集萬里長空飛不到珠簾捲盡還羞入問向晚誰  
欲畫漁蓑寒江立天黯澹催殘日波浩渺添寒力  
又何如聊遣舞衣紅濕好與月娥臨晚砌莫教先放  
梅花拆便準擬一醉廣寒宮千山白

女冠子

雪

周邦彥



同雲密布撒梨花柳絮飛舞樓臺悄似玉向紅爐暖  
閣院宇深沈廣排筵會聽笙歌猶未徹漸覺輕寒透  
簾穿戶亂飄僧舍密灑歌樓酒帘如故想樵人山  
徑迷蹤路料漁父收綸罷釣歸南浦路無伴侶見孤  
村寂寞招颺酒旗斜處南軒孤鴈過嚦嚦聲聲又無  
書度見臘梅枝上嫩蕊兩兩三三微吐

紅林擒近

雪二首

前人

高柳春纔軟凍梅寒更香暮雪助清峭玉塵散林塘  
那堪飄風遞冷故遣度幕穿窻似欲料理新妝呵手

弄絲簧 冷落詞賦客蕭索水雲鄉援毫授簡風流  
猶憶東梁望虛檐徐轉迴廊未埽夜長莫惜空酒觴

前調

風雪驚初霽水鄉增暮寒樹杪墜毛羽檐牙挂琅玕  
才喜門堆巷積可惜迤邐銷殘漸看低竹翩翩清池  
漲微瀾 步履晴正好宴席晚方歡梅花耐冷亭亭  
來入冰盤對前山橫素愁雲變色放杯同覓高處看

昭君怨

雪

韓駒

昨日樵邨漁浦今日瓊川銀渚山色捲簾看老峰巒



古今圖書集成  
錦帳美人貪睡不覺天孫剪水驚問是楊花是蘆花

青玉案 詠雪

陳瓘

碧空黯淡同雲繞漸枕上風聲峭明透紗窗天欲曉  
珠簾纔捲美人驚報一夜青山老使君命客金尊  
倒千里瓊瑤未經掃敲壓江梅春信早十分農事滿  
城和氣管取來年好

江城子 大雪與客登極目亭

葉夢得

蹁躑飛舞半空來曉風催巧縈迴野曠天遙回望興

悠哉欲問玉京知遠近試攜手上高堂雲濤無際  
卷崔嵬斂浮埃照瓊瑰點綴林花真箇是多才說與  
化工畱妙手休盡放一時開

朝中措 雪景

張掄

蕭蕭蘆葉暮寒生雪壓凍雲平密灑一篷煙火驚鴻  
飛起沙汀收綸罷釣空江有浪短櫂無聲便是天  
然圖畫何須妙手丹青

醜奴兒令 詠雪

康與之

馮夷剪破澄溪練飛下同雲著地無痕柳絮梅花處



處春 山陰此夜明如晝月滿前村莫掩溪門恐有  
扁舟乘興人

水龍吟 雪

楊无咎

小軒瀟灑清宵午風正緊門深閉藜牀危坐竹窻頻  
聽春蟲撲紙燈燼垂紅篆煙消碧衣輕如水料飛花  
未止堆檐已滿時摧折琅玕尾 骨冷魂清無寐這  
身在廣寒宮裏暗懷千古渾疑一夜冰生腸胃歲事  
崢嶸故園睽阻歸期猶未向寒鄉不念豐年只憶青  
天萬里

朝中措 建康大雪

侯寘

漏雲初見六花開驚巧妬江梅飄灑元戎小隊玉妝  
旌旆歸來 恩同化手春回隴畝懽倒尊罍記取明  
朝登覽綠漪惟有秦淮

鷓鴣天 和趙文鼎賦雪

辛棄疾

莫上扁舟訪剡溪淺斟低唱正相宜從教犬吠千家  
白且與梅成一段奇 香暖處酒醒時畫簷玉筍已  
偷垂笑君解釋春風恨倩拂蠻牋只費詩

滿江紅 雪霽

前人



天上飛瓊畢竟向人間情薄還又跨玉龍歸去萬花  
搖落雲破林梢添遠岫月明屋角分層閣記少年駿  
馬走韓盧掀東郭吟凍鴈嘲飢鵲人已老歡猶昨  
對瑤華滿地與君酬酢最愛霏霏迷遠近都收擾擾  
還空廓待羔兒飲罷又烹茶揚州鶴

念奴嬌

韓南澗載酒  
過雲樓觀雪

前人

兔園舊賞悵遺蹤飛鳥千山都絕縞帶銀杯江上路  
惟有南枝香別萬事新奇青山一夜對我頭先白倚  
巖千樹玉龍飛上瓊闕莫惜霧鬢雲鬟試教騎鶴

去約尊前月自與詩翁磨凍硯看掃幽蘭新闕便擬  
明年人間揮汗畱斫層冰潔此君何事晚來曾為腰  
折

水調歌頭

和王政之  
吳江觀雪

前人

造物故豪縱千里玉鸞飛等閒更把萬斛瓊粉蓋玻  
瓈好卷垂虹千丈只放冰壺一色雲海路應迷老子  
舊遊處回首夢耶非謫仙人鷗鳥伴兩忘機掀髯  
把酒一笑詩在片帆西寄語煙波舊侶聞道尊鱸正  
美休裂芰荷衣上界足官府汗漫與君期



減字木蘭花

雪

范成大

玉煙浮動銀闕三山連海凍翠袖闌干不怕樓高酒  
力寒 雙松凍折忽憶衰翁容易別想見鷗邊壓損  
年時小釣船

清平樂

詠雪

程垓

疎疎整整風急花無定紅燭照筵寒欲凝時見篩簾  
玉影 夜深明月籠紗醉歸涼面香斜猶有惜梅心  
在滿庭誤作吹花

謁金門

春雪

韓元吉

春尚淺誰把玉英裁剪盡道梅梢開未徧捲簾花滿  
院 樓上酒融歌暖樓下水平煙遠却似湧金門外  
見絮飛波影亂

水龍吟

雪

管鑑

曉來密雪如篩望中瑩徹還如洗梅花過了東君又  
放滿城桃李碎翦瓊英高林低樹巧妝勻綴更江山  
秀發田疇清潤滿眼是豐年意 誰念危樓獨倚共  
飄零茫茫天際毫端句澀杯中酒減歡情難寄天爲  
淒涼暫時遮盡黃茅白葦但神州目斷珠宮玉闕隔



三千里

喜遷鶯 雪

王千秋

玉龍垂尾望闕角苔蕘如侵雲裏明壁榱題白銀階  
陞平日世間無事靜久聲鳴檻竹夜半色侵牕紙最  
奇處盡巧妝枝上低飛檐底 當為呼遊騎嗾犬擎  
蒼腰箭隨鄰里藉草烹鮮枯枝煎茗點化玉花為水  
未挹瑤臺風露且借瓊林棲倚眩銀海待斜披鶴氅  
騎鯨尋李

風流子 雪

前人

同雲垂六幕啼鳥靜風御玉妃寒漸聲入釣蓑色侵  
書幌似花如絮結陣成團倦游客一番詩思苦無算  
酒腸寬黃竹調悲綺衾人病豈堪梅蕊索笑巡檐  
一杯知誰勸空搔首還是憶舊青氈問素娥早晚光  
射江干待醉披鶴氅高吟冰柱剡溪何妨乘興空還  
只恐櫓聲咿軋棲鳥難安

賀新郎 姑蘇臺  
觀雪

盧祖皋

十傾涵空碧畫圖中崢嶸幻玉亂零吹壁倚徧危闌  
吟不盡把酒風前岸憤記當日西湖為客誰剪吳淞



古今圖書集成  
江上水笑乾坤奇事成兒劇還照我夜窻白 崇臺  
目斷清無極引枝筇瓊瑤步軟印登臨屐娃館娉婷  
知何在淚粉愁濃恨積故作飛花狼籍舊事悠悠  
渾莫問有玉蟾醉裏會相識聊伴我吹羌笛

水龍吟

雪

史達祖

夢回虛白初生便疑冷月通牕戶不知夜久都無人  
見玉妃起舞銀界四天瓊田易地恍然非故想見兒  
童健意生愁霽色情頻在窺簾處 一片樵林釣浦  
是天教王維畫取未知授簡先將高興如歸妙句江

路梅愁灞陵人老又騎驢去過章臺記得春風乍見  
倚簾吹絮

東風第一枝

春雪

前人

巧沁蘭心偷黏草甲東風欲障新暖謾疑碧瓦難留  
信知暮寒較淺行天入鏡做弄出輕鬆纖軟料故園  
不捲重簾悞了乍來雙燕 青未了柳回白眼紅欲  
斷杏開素面舊遊憶著山陰後盟遂妨上苑熏爐重  
熨便放慢春衫鍼線怕鳳鞞挑菜歸來萬一灞橋相  
見



徵招 雪

趙以夫

玉壺凍裂琅玕折駸駸逼人衣袂暖絮漲空飛失前  
山橫翠欲低還又起似妝點滿園春意記憶當時刻  
中情味一溪雲水 天際絕人行高吟處依稀灞橋  
鄰里更翦翦梅花落雲階月砌化工真解事強勾引  
老來詩思楚天暮驛使不來悵曲闌獨倚

一翦梅 客中  
新雪

方岳

誰翦輕瓊做物華春遶天涯水遶天涯園林曉樹恁  
橫斜道是梅花不是梅花 宿鷺聯拳倚斷槎昨夜

寒些今夜寒些孤舟箬笠釣煙沙待不思家怎不思  
家

念奴嬌 夢雪

前人

問天何事雪垂垂欲下又還晴却春到梅梢香逗也  
儘有心情行樂剡曲舟迴灞橋詩在一笑人如昨此  
情分付暮天寒月殘角 誰道飛夢江南羣山如畫  
一一瓊瑤琢中有玉田三萬頃云是幼輿丘壑招我  
歸來和春醉去休跨揚州鶴萬花曾約酒醒當有新  
作



古今圖書集成  
紅林擒近

雪次周美成韻二首

方千里

花幕高燒燭獸煙深炷香寒色上樓閣春威徧池塘  
多情天孫織罷故與玉女穿窻素臉淺約宮妝風韻  
勝笙簧 遊冶尋舊侶尊酒老吾鄉清歌度曲何妨  
塵落雕梁任瑤階平尺珠簾人報賸拚酪酊飛羽觴

前調

前人

曉起山光慘晚來花意寒映月衣纖縞因風珮琅玕  
三弄江梅聽徹幾點岸柳飄殘宛然舞曲初翻簾影  
捲波瀾 把酒同喚醉促膝小畱歡清狂痛飲能消

多少杯盤况人生如寄相逢年老歲華休作容易看

前調

前題二首

楊澤民

輕有鵝毛體白無龍腦香瓊笋綴飛桷冰壺鑑方塘  
渾如瑤臺閨苑更無茅舍蓬窻畫閣自有梅妝貪耍  
罷彈簧 鼓舞沾酒市蓑笠釣魚鄉遐觀自樂吾心  
何必濠梁待喬木都凍千山盡老更煩玉指勸羽觴

前調

前人

梅信初回暖風稜猶壯寒禾稼響圭壁簾旌隱琅玕  
門前羣山尚滿窻外數片餘殘凍底潛有魚翻東風



漸生瀾 杖策扶半醉燕寢有餘歡兒童自捧皚皚  
調密盈盤兆豐穰和氣來呈美瑞莫同輕薄飛絮看

洞仙歌

雪

沈端節

夜來驚怪冷逼流蘇帳夢破初聞竹窻響向曉開簾  
看凌亂寒光清興發鶴氅誰同縱賞 江南春意動  
梅竹潛通醉帽衝風自來往慨念故人疎便理扁舟  
須信道吾曹清曠待石鼎煎茶洗餘醺更依舊歸來  
淺斟低唱

掃花遊

春雪

吳文英

水雲共色漸斷岸飛花雨聲初峭步帷素裊想玉人  
誤惜章臺春老岫斂愁蛾半洗鉛華未曉艤輕棹似  
山陰夜晴乘興初到 心事春縹緲記徧地梨花弄  
月斜照舊時鬪草恨凌波路狹小庭深窈凍蕊瓊簫  
漸入東風郢調暖回早醉西園亂紅休掃

無悶

催雪

前人

霓節飛瓊鸞駕弄玉杳隔平雲弱水倩皓鶴傳書衛  
姨呼起莫待粉河凝曉趁夜月瑤笙飛環珮蹇驢吟  
影茶煙竈冷酒亭門閉 歌麗泛碧蟻放繡箔半鉤



寶臺臨砌要須借東君灞陵春意曉夢先迷楚蝶早  
風戾重寒侵羅被還怕掩深院梨花又作故人清淚

紅林擒近

雪次周美成韻二首

陳允平

飛絮迷芳意落梅銷暗香皓鶴唳空碧白鷗避寒塘  
妨他踏青鬪草便放曉日東窗先自嬾弄晨粧誰耐  
聽笙簧望帘尋酒市看釣認漁鄉控持紫燕芹泥  
未上雕梁想梁園謝館尋花較晚但陪玉樹頻舉觴

前調

前人

三萬六千頃玉壺天地寒庾嶺封的皜淇園折琅玕

漠漠梨花爛漫紛紛柳絮飛殘直疑橫潦驚翻斜風  
泝狂瀾對此頻勝賞一醉飽清歡呼童翦韭和冰  
先薦春盤怕東風吹散畱尊待月倚闌莫惜今夜看

六么令

雪

周密

癡雲翦素檐滴夜深悄銀城飛捷翠隴占瑞豐年報  
白戰清吟未了寒鵲爭枝曉鶴迷華表山陰醉臥今  
日何人問安道交映虛窻淨沼不許遊塵到誰念  
絮帽茸裘歎幼安今老玉鑑修眉未埽白雪詞新草  
冰蟾光皎梅心香動閒看春風上瓊島



前調 春雪

前人

迴風帶雨凍蕊漏聲悄小窗照影虛白幾悞鄰鷄報  
千樹天桃綻了鵲立通明曉眼空八表宮袍帶月醉  
裏應迷灞陵道 風靜瓊林翠沼片片隨春到吟鞞  
十里新堤怪四山青老玉唾珠塵怕掃句冷池塘草  
白天寒皎飛瓊何在夢覺梨雲度仙島

聲聲漫 催雪

王沂孫

風聲慙快雲意商量連朝滕六遲疑茸帽貂裘兔園  
準擬吟詩紅爐旋添獸炭辦金船羔酒溶脂問剪水

恁工夫猶未還待何時 休被梅花爭白好跨奇鬪  
巧早徧瓊枝綵索金鈴佳人等塑獅兒怕寒繡帷慵  
起夢梨雲說與春知莫誤了約王猷船過剡溪

無悶 雪意

前人

陰積龍荒寒度雁門西北高樓獨倚悵短景無多亂  
山如此欲喚飛瓊起舞怕攪碎紛紛銀河水凍雲一  
片藏花護玉未教輕墜 清致悄無似有照水南枝  
已攬春意誤幾度憑欄莫愁凝盼應是梨花夢好未  
肯放東風來人世待翠管吹破蒼茫看取玉壺天地



柳梢青 清明夜雪

張炎

一夜凝寒忽成瓊樹換却繁華因甚春深片紅不到  
綠水人家 眼驚白晝天涯空望斷塵香鈿車獨立  
東風曲闌惆悵莫是梨花

探春慢 雪霽

前人

銀浦流雲綠房迎曉一抹牆腰月淡暖玉生香懸冰  
解凍碎滴瑤階如霰纔放些晴意早瘦了梅花一半  
也知不作花香東風何事吹散 搖落似成秋苑甚  
釀得春來怕教春見野渡舟迴前村門掩應是不勝

清怨次第尋芳去灞橋外蕙香波暖猶聽簷聲看燈  
人在深院

摸魚兒 春雪客中寄友

前人

又孤吟灞橋深雪千山絕盡飛鳥梅花也著東風笑  
一夜瘦添多少春悄悄正斷夢愁詩忘却池塘草前  
邨路杳看野水流冰舟閒渡口何必見安道 慵登  
眺脉脉霏霏才了寒威猶自清峭終須幾日開晴去  
無奈此時懷抱空懊惱料酒興歌情未肯隨人老惜  
花起早拚醉裏忘歸接羅更好一笑任傾倒



念奴嬌

雪

姚勉

鷓鴣夜冷怪地爐煨酒經時難熱曉起盤風天舞絮  
拍手兒童歡悅客裏新吟天葩翦巧思與梅爭發使  
君屬和雪花同是三絕未須賦就梁園陽春拍調  
壓倒唐元白早晚聯鑣花底去共看朝霞銀闕朝退  
歸來清虛堂裏醉灑淋漓墨而今且對聚星堂上賓  
客

驀山溪

雪二首

何夢桂

春工未覺何處瓊英早夜半翦銀河到人間樓臺初

曉霏霏脈脈不是不多情金帳暖玉堂深却怪音塵  
杳天公滴下暫落紅塵道顏色自還憐怕輕狂隨  
風顛倒冰心誰訴但吹入梅花明月地白雲階相照  
天寒好

前調

前人

飛仙欲下水殿嚴妝早嬌澀怕春知跨白虬天門未  
曉霓裳零亂肥骨自清妍梅簷月柳橋風世上紅塵  
杳重門深閉忘却山陰道呼酒嚼瓊花任醉來玉  
山傾倒無言相對這歲暮心期茅舍外玉堂前處處



風流好

念奴嬌 催雪

朱淑真

冬晴無雪是天心未肯化工非拙不放玉花飛墮地  
畱在廣寒宮闕雲欲同時霰將集處紅日三竿揭六  
花翦就不知何處施設 應念隴首寒梅花開無伴  
對景真愁絕待出和羹金鼎手為把玉鹽飄撒溝壑  
皆平乾坤如畫更吐冰輪潔梁園宴客夜明不怕燈  
滅

前調 殘雪

前人

鵝毛細翦是瓊珠密灑一時堆積斜倚東風渾漫漫  
頃刻也須盈尺玉作樓臺鉛鎔天地不見遙岑碧佳  
人作戲碎揉些子拋擲 爭奈好景難留風儼雨憇  
打碎光凝色縱有十分輕妙態誰似舊時憐惜擔閣  
梁吟寂寥楚舞笑捏獅兒隻梅花依舊歲寒松竹三  
益

清平樂 雪

孫道綯

悠悠颺颺做盡輕模樣半夜蕭蕭窗外響多在梅邊  
竹上 朱樓向晚簾開六花片片飛來無奈熏爐烟



古今圖書集成  
霧騰騰扶上金釵

歸朝歡

對雪追  
和東坡

無名氏

透隙敲牕風撼撼坐見廣庭霜縞白長安道上正騎  
驢蔡城裏誰堅壁表表風塵物瑤林瓊樹三豪客對  
揮毫連珠唱玉競把詩箋擲草草杯盤還促席痛  
飲狂歌話曾臆前村昨夜放梅花東鄰休把誇容色  
清歡那易得明朝烏轡升南極帶隨車黃壚咫尺莫  
作山河隔

青玉案

雪

金完顏壽

凍雲封却駝岡路有誰訪溪梅去夢裏疎香風暗度  
覺來惟見一窻涼月瘦影無尋處明朝畫筆江天  
暮定向漁蓑得奇句問簾前深幾許兒童笑道黃昏  
時候猶是簾纖雨

滿江紅

詠雪

元李俊民

漠漠愁陰銀界曉皓然一色誰翦水就中撩亂燕山  
如席天若有情天也老高山底事頭先白甚教人錯  
恨五更風花狼籍寒欲退劉叉筆深欲沒韋郎膝  
問何如江上孤舟蓑笠不見過門多惡客等閒踏破



古今圖書集成  
瓊瑤迹便龕豪下馬坐人牀尋歡伯

選冠子 對雪

張翥

凍雨跳空朔雲屯地陡覺寒無賴誰從蕊闕宴罷羣  
仙一樣佩零珠解應喚馮夷起舞回風攪碎渺茫銀  
海倚南窗清思盈襟看盡整容斜態 君試問白羽  
鳴笳青貂束錦千騎獵歸烟塞何如倦客蠟屐支筇  
乘興竹邊梅外隨處堪尋賣酒人家春渚水香挑菜  
趁湖山晴曉吟魂飛上玉峯瑤界

前調 歲晚再雪  
仍用前韻

前人

歲晚江空雪飛風起老境若爲聊賴家人解事準備  
深尊旋遣夜窻寒解萍梗孤蹤幻影浮生萬里喜還  
聞海但囊中畱得詩篇爛寫山情水態 真比似一  
個冥鴻南來北去閱盡幾重關塞名韉利鎖絆煞英  
雄都付醉鄉之外惟不能忘一舸吳淞鱸膾豉羹蓴  
菜且今宵還我冰壺天地眼空塵界

瑤華 雪

張雨

篩冰爲霧屑玉成塵借阿姨風力千巖競秀怎一夜  
換作連城之壁先生閉戶怪日短寒駒催隙想平沙



鴻爪成行却似醉時書跡 未隨埋沒雙尖便淡掃  
蛾眉與鬪春色裁詩白戰驢背上駝取灞橋吟客撚  
鬚自笑儘未讓諸峯頭白看洗出宮柳梢頭已借淡  
黃塗額

如夢令 春雪

明楊基

點綴落梅穠李埋沒蒼苔芳芷樓上倚闌人立在玉  
屏風裏風起風起都做一江春水

摸魚兒 斷橋 殘雪

瞿佑

望西湖玉花飄後嫩寒猶自凝 瓦瑤臺夢斷飛瓊老

惆悵今吾非故斜日暮試指點橋南橋北經行路佳  
期又誤正環玦隨波淚鉛成水流入裏湖去 凭闌  
處十里銀沙分布水泥深阻行步孤山欲訪梅花信  
除是扁舟飛渡君莫訴君不見酒尊誰酌逋仙墓詩  
魂未遇但寂寞黃昏月香水影吟盡斷腸句

蝶戀花 斷橋 殘雪

莫璠

快雪時晴寒尚冱玉屑銀沙紛滿湖南路一道垂虹  
如約素裙腰草色非前度 斷玦遺環愁日暮想像  
凌波羅襪應難步欲探梅花何處所山童指點逋仙



墓

望江南 雪

楊慎

晴雪好萬瓦玉鱗浮照夜不隨青女去羞明應為素  
娥畱只欠剡溪舟

漁家傲 冬雪

吳子孝

日暖雪花飛片片幻成六出如鋪練庭下早梅香自  
獻寒灑激仙姿欲鬪瓊瑤萼薄酒一卮聊獨勸貂  
裘坐擁紅爐豔城裏人家都十萬風滿院祇愁破屋  
饑寒徧

前調

前人

江上雪花如落絮山前釣艇還歸去林鳥不啼村市  
暮人踽踽板橋路滑驢難度詩興滿懷誰共賦吟  
肩瘦聳尋梅塢擁袖撚鬚成妙句寒不語冰澌聲遶  
沙堤樹

歸朝歡 春雪

前人

新歲郊原織草碧陡然寒甚同雲密雪花如掌逐狂  
飈冰澌似玉流香陌凍成天地白江山萬里都輝赫  
泛蘭舟捲簾四望佳景真奇特江南二月非江北



古今圖書集成  
茂苑千花當盡拆天公有意厭塵氛人間借作瑤臺  
色雲巖天咫尺山頭老樹鷓鴣翻日酒酣時登高能賦  
聊倩春風筆

多麗

晚春  
雪景

王世貞

醉飛瓊惱亂瑤池清讌吉玲瓏鳳釵敲碎蕩成滿地  
飄霰送天桃武陵幾樹伴梨花杜曲千片妬我春衫  
粧他寒食乍驚蜂蝶又猜鶯燕五陵畔雜和烟雨寶  
馬踏青轉樊樓銀箏細炙紅爐重煖 怯寒色條桑  
小婦羃羅輕護嬌面轉纖彎一雙蓮瓣屐齒香泥粉

痕淺冷落流光萋迷餘景東風無計玉山軟天公老  
被伊瞞過紅日幾時見空擔閣無主野芳滿日愁怨

永遇樂

書懷

馮琦

不願爲雲何須似雨但求如雪雨落難收雲濃易散  
惟雪稱奇絕亂點梅梢細勻花瓣玉色都無分別倩  
微風吹入華軒悄把繡幃輕揭 梅解偷香雪如傳  
粉賈女何郎相悅漏泄春光東皇相妬不得常攀折  
雪片都消梅香依舊瘦影冷侵孤月問何時重上瑤  
堦明歲寒時節



點絳脣

題雪圖

施紹莘

水墨江天濛濛野色微微樹儘堪題句風雪溪橋路  
一點人行正在模糊處衝寒去打頭狂絮人遠天涯  
暮

青玉案

山林積雪

李伊玉

梵宮百尺同雲護漸白滿蒼苔路破臘梅花香早露  
銀濤無際玉山萬里寒罩江南樹 鴉啼影亂天將  
暮海月纖痕映烟霧脩竹低垂孤鶴步楊花風弄鵝  
毛天翦總是詩人誤

雪部選句

楚屈原九歌霰雪紛其無垠兮雲霏霏而承宇  
九章悲霜雪之俱下兮聽潮水之相擊

宋玉九辯霰雪雰糅其增加兮乃知遭命之將至  
招魂增冰峩峩飛雪千里些

魏曹植洛神賦髣髴兮若輕雲之蔽月飄飆兮若流  
風之迴雪

陸機感時賦敷層雲之葳蕤墜零雪之揮霍

晉孫楚雪賦堯九載以山栖兮湯請禱於桑林罔二



古今圖書集成  
聖以濟世兮孰繁衍以迄今嗟亢陽之踰時兮情反  
側以寢興豐隆灑雪交錯翻紛膏澤偃液普潤中田  
肅肅三麥實獲豐年

明費元祿轉情集雪景飄殘柳絮總無烏鵲銜飛點  
遍棕衣惟有漁翁下釣又四境盡浮泯泯却同無地  
千山已老茫茫詎復見天穿簾誤作梅花照室渾疑  
日月又馬迷熟道犬吠歸人門外五更朝士應愁踏  
凍林中三尺村農舉賀豐年又船窻皎潔分布被之  
蘆花堦砌鮮妍結茅簷之冰柱

漢秦嘉詩飛雪覆庭

晉陶潛詩淒淒歲暮風翳翳經日雪

宋謝靈運詩明月照積雪朔風勁且哀又騷屑出穴  
風揮霍見日雪

謝惠連詩繁雲起重陰迴飈流輕雪

鮑照詩北風十二月雪下如亂巾又陰崖積夏雪陽  
谷散秋榮又胡風吹朔雪千里度龍山

梁范雲詩寒沙四面平飛雪千里驚

裴子野詩集霰淪丹黻流雲飄繡柱滴瀝垂土膏闌



千懸石乳 又 飄飄千里雪 倏忽度龍沙

張正見詩九冬飄遠雪六出表豐年 又 同雲遙映嶺

瑞雪近浮空

唐太宗詩瀚海百重波陰山千里雪

許敬宗詩騰華承玉宇凝照混金娥

蘇頲詩寫月含珠綴從風薄綺疏

劉長卿詩野雪空齋掩

李弘茂詩甜於泉水茶須信狂似楊花蝶未知

杜甫詩岸風翻夕浪舟雪灑寒燈 又 樓雪融城濕宮

雲去殿低 又 微雪不到地寒空時有無 又 朔風吹桂

水披雪夜紛紛 又 窻含西嶺千重雪

盧綸詩竹雪覆柴門

于鵠詩微風吹凍葉餘雪落寒枝

韓愈詩隨車翻縞帶逐馬散銀杯

孟郊詩朔雪寒斷指

元稹詩凍雪墮磚堦

白居易詩庭霜封石稜池雪印鶴跡 又 黃昏慘慘天

微雪修行坊西鼓聲絕 又 可憐今夜鵝毛雪引得高



情鶴擎人 又 寂寞滿爐灰飄零上堦雪

朱慶餘詩斜雪微霑砌

雍陶詩胡盧河畔逢秋雪疑是風飄白鶴毛

許渾詩門掩荒山夜雪深

李商隱詩已隨江令誇瓊樹又入盧家妬玉堂 又 臘

雪已添牆下水

溫庭筠詩閉門羣動息積雪透疎林

方干詩暝雪細聲積

鄭谷詩正馬愁衝晚村雪孤舟悶阻春江風

韓偓詩損花微雪似無情

盧延讓詩渡水蹇驢雙耳直避風羸僕一肩高

李建勳詩聽雪添詩思看山滯酒巡

幸夤遜詩深糝玉瓦平無壠亂拂蘆花細有聲

無名氏詩鳥向不香花裏宿人從無影月中歸 又 輕

著凍痕銷水面密隨和氣入花根 又 萬木盡如花落

候四簷鳴似雨來時

宋蘇軾詩東風吹濕雪 又 瓦屋寒堆春後雪蛾眉翠

掃雨餘天



黃山谷詩刻獸堆鹽虎為山倒玉人

陸游詩急雪打窗心共碎又雲停雪意酣

惠崇詩鳥歸杉墮雪

金元德明詩著柳直疑香絮重擁堦還似落花深

吳激詩窻明憐雪在

元楊維禎詩龍噴雨花天作瑞象占雲葉氣生和

欽定古今圖書集成曆象彙編乾象典

第九十二卷目錄

雪部紀事一



乾象典第九十二卷

雪部紀事一

列子湯問篇師文鼓琴當夏而叩羽絃以召黃鍾霜雪交下

拾遺記周靈王起昆昭臺召諸方士有二人乘飛鳳之輦上席時赤旱一人能以歌召霜雪于是引氣一吸雲起雪飛

周王子晉臨丹井而窺有青雀銜玉杓以授子晉子晉取而食之乃有雲起雪飛子晉以衣袖揮雲則雲



雪自止

左傳楚子狩于州萊次于潁尾使蕩侯潘子司馬督囂尹午陵尹喜帥師圍徐以懼吳楚子次於乾谿以爲之援雨雪王皮冠秦復陶翠被豹舄執鞭以出良士傳羊角哀左伯桃俱適楚求仕道遇雪宿空柳中度不能全乃併衣糧與伯桃角哀死樹中

王孫子昔衛君重裘累茵而坐見路有負薪而哭者問曰何故也對曰雪下衣薄是以哭之於是衛君懼見於顏色曰爲君而不知民孰以我爲君於是開府

金出倉粟以賑貧窮

晏子景公之時雨雪三日而不霽公被狐白之裘坐堂側陞晏子入見立有間公曰怪哉雨雪三日而天不寒晏子對曰天不寒乎公笑晏子曰嬰聞古之賢君飽而知人之飢溫而知人之寒逸而知人之勞今君不知也公曰善寡人聞命矣乃令出裘發粟與飢寒令所睹於塗者無問其鄉所睹于里者無問其家循國計數無言其名士旣事者兼月疾者兼歲孔子聞之曰晏子能明其所欲景公能行其所善也



琴操曾子耕太山下雨雪不得歸思父母作梁山操  
戰國策魏惠王死葬有日矣天大雨雪至於牛日壞  
城郭且爲棧道而葬羣臣多諫太子者曰雪甚如此  
而喪行民必甚病之官費又恐不給請弛期更日太  
子曰爲人子而以民勞與官費用之故而不行先王  
之喪不義也子勿復言羣臣皆不敢言而以告犀首  
犀首曰吾未有以言之也是其唯惠公乎請告惠公  
惠公曰諾駕而見太子曰葬有日矣太子曰然惠公  
曰昔王季歷葬于楚山之尾灤水齧其墓見棺之前

和文王曰嘻先君必欲一見羣臣百姓也夫故使灤  
水見之于是出而爲之張朝百姓皆見之三日而後  
更葬此文王之義也今葬有日矣而雪甚及牛日難  
以行太子爲及日之故得毋嫌于欲亟葬乎願太子  
更日先王必欲少畱而扶社稷安黔首也故使雪甚  
因弛期而更爲日此文王之義也若此而弗爲意者  
羞法文王乎太子曰甚善敬弛期更擇日惠子非徒  
行其說也又令太子未葬其先王而又因說文王之  
義說文王之義以示天下豈小功也哉



古今圖書集成  
史記滑稽傳東郭先生久待詔公車貧困飢寒衣敝履不完行雪中履有上無下足盡踐地道中人笑之東郭先生應之曰誰能履行雪中令人視之其上履也其履下處乃似人足者乎

漢書匈奴傳漢初定中國徙韓王信於代都馬邑匈奴大攻圍馬邑韓王信降匈奴匈奴得信因引兵南踰句注攻太原至晉陽下高帝自將兵往擊之會冬大寒雨雪卒之墜指十二三

李廣利傳廣利爲貳師將軍伐宛軍還詔曰貳師將

軍廣利征討厥罪伐勝大宛賴天之靈從沂河山涉流沙通西海山雪不積士大夫徑度獲王首虜珍怪之物畢陳於闕其封廣利爲海西侯食邑八千戶蘇武傳單于欲降武乃幽武置大窖中絕不飲食天雨雪武臥齧雪與旃毛并咽之數日不死匈奴以爲

神

飛燕外傳飛燕通鄰羽林射鳥者飛燕貧與合德共被夜雪期射鳥者於舍傍飛燕露立閉息順氣體溫舒亡疹粟射鳥者異之以爲神僊



古今圖書集成  
漢書王莽傳天鳳二年大雪關東尤甚深者一丈竹枝皆枯

拾遺記魏明帝二年昆明國貢漱金鳥畏霜雪乃起小屋處之名曰辟寒臺

後漢書袁安傳安字邵公汝南汝陽人初爲縣功曹後舉孝廉注汝南先賢傳曰時大雪積地丈餘洛陽令自出案行見人家皆除雪出有乞食者至袁安門無有行路謂安已死令人除雪入戶見安僵臥問何以不出安曰大雪人皆饑不宜干人令以爲賢舉爲

### 孝廉也

段熲傳熲字紀明武威姑臧人延熹二年遷護羌校尉明年春羌與燒何大豪寇張掖攻沒鉅鹿塢又招同種千餘落并兵晨奔熲軍熲下馬大戰至日中刀折矢盡敵亦引退熲追之且鬪且行晝夜相攻割肉食雪四十餘日遂至河首積石山斬燒何大帥首敵五千餘人

黃憲外史李膺訪徵君於衡門雪甚道遇郭泰而問曰子得見叔度耶曰泰也以布衣交安得不見子以



軒冕交亦軒冕者謁之耳安得見李膺有慚色乃稅  
駕於野與郭泰乘蹇驢而造焉有樵者臨溪浣足而  
歌曰衡門之雪霏霏今有客緼袍寒谿澹而無聲兮  
木落遠臯二子聞而凄然

汝南先賢傳潁川胡定字元安至行絕人在喪雉兔  
遊其庭夜雪覆其室縣令遣戶曹排雪問定定已絕  
穀妻子皆臥在牀令遣掾以乾糒就遺定乃受半  
英雄記魏遣諸葛誕攻東興諸葛恪率軍拒之丁奉  
曰今諸軍行遲若敵據便地則難與爭鋒矣乃徑進

據徐塘天寒雪敵諸將置酒高會奉曰取封侯爵賞  
正在今日乃使兵解鎧著冑持短兵敵人從而笑焉  
不爲設備奉縱兵砍之大破敵前屯

杭州府志漢慧明姓王氏錢塘人居蔣州山間值雪  
路塞七日不食至荊州四望山見二虎爭鬪以杖格  
解焉

魏志焦先傳注先自作一蝸牛廬後爲野火所燒先  
因露寢冬雪大至袒臥不移人以爲死就視知生  
神仙傳焦先作庵天忽大雪人屋多壞先庵倒人往



不見所在恐已凍死乃共拆庵求之見先熟臥於雪下顏色赫然氣息休休如盛暑醉臥之狀

晉書武帝本紀太康七年河陰雨赤雪二項是歲扶南等二十一國馬韓等十一國遣使來獻

賈充傳充都督秦涼二州諸軍事充既外出自以為失職將之鎮百僚餞於夕陽亭荀勗私焉俄而侍宴因言充女才質令淑宜配儲宮帝納其言會京師大雪平地二尺軍不得發既而皇儲當婚遂不西行詔充居本職

曹攄傳攄為尚書郎轉洛陽令仁惠明斷百姓懷之時天大雨雪宮門夜失行馬羣官檢察莫知所在攄使收門士眾官咸謂不然攄曰宮掖禁嚴非外人所敢盜必是門士以燎寒耳詰之果服

陸機傳成都王穎起兵討長沙王假機後將軍河北大都督宦人孟玖譖機於穎言其有異志使牽秀收機遂遇害是日昏霧晝合大風折木平地尺雪議者以為陸氏之寃

新蔡武哀王騰傳騰字元邁末嘉初遷車騎將軍都



古今圖書集成  
督鄴城守諸軍事鎮鄴發并州次於真定值大雪平地數尺營門前方數丈雪融不積騰怪而掘之得玉馬高尺許表獻之

世說陶公少有大志家酷貧同郡范逵投侃宿於時冰雪積日侃室如懸磬而逵馬僕甚多侃母湛氏語侃曰汝但出外畱客吾自爲計湛頭髮委地下爲二髮賣得數斛米斫諸屋柱悉割半爲薪剉諸薦以爲馬草日夕設精食從者皆無所乏

晉書陶侃傳侃遷都督荆雍益梁州諸事時造船木

屑竹頭悉令舉掌之咸不解其所以後正會積雪始晴廳事前餘雪猶濕於是以前布地

世說羊孚作雪贊云資清以化乘氣以霏遇象能鮮卽潔成輝桓引遂以書扇

桓大司馬乘雪欲獵先過王劉諸人許真長見其裝束單急問老賊欲持此何作桓曰我若不爲此卿輩亦那得坐談

渚宮故事晉習鑿齒爲桓溫主簿從溫出獵時大雪於臨江城西見草雪上氣出覺有物射之應弦死往



古今圖書集成  
取之乃老雄狐脚上帶絳繒香囊

世說道壹道人好整飾音辭從都下還東山經吳中已而會雪下未甚寒諸道人問在道所經壹公曰風霜固所不論乃先集其慘澹郊邑正自飄瞥林岫便已浩然

謝太傅寒雪日內集與兒女講論文義俄而雪驟公欣然曰白雪紛紛何所似兄子胡兒曰撒鹽空中差可擬兄女曰未若柳絮因風起公大笑樂  
王長史爲中書郎往敬和許爾時積雪長史從門外

下車步入尙書著公服敬和遙望歎曰此不復似世中人

晉書王徽之傳徽之嘗居山陰夜雪初霽月色清明四望皓然獨酌酒詠左思招隱詩忽憶戴逵逵時在剡便夜乘小船詣之經宿方至造門不前而反人問其故徽之曰本乘興而來興盡而反何必見安道邪世說王司州嘗乘雪往王摛許司州言氣少有悟逆於摛便作色不夷司州覺惡便輿牀就之持其臂曰汝詎復足與老兄計摛撥其手曰冷如鬼手馨強來



古今圖書集成  
捉人臂

晉書王恭傳恭美姿儀人多愛悅或目之云濯濯如春月柳嘗被鶴氅涉雪而行孟昶窺見之嘆曰此真神仙中人也

世說桓元初并西夏領荆江二州二府一國于時始雪五處俱賀五版並入元在廳事上版至卽答版後皆粲然成章不相採雜

孫氏世錄孫康家貧嘗映雪讀書

北涼錄酒泉南有銅駝山言虜犯者有大雪沮渠蒙

遜使工取之得綿數萬劬

雲笈七籤李奚子者晉東平太守李忠祖母也不知姓氏忠祖父貞節丘園性多慈憫以陰德爲事奚子每與一志務于救人大雪寒凍路積稻及穀於園庭恐禽鳥餓死其用心如此今得道而居華陽洞宮中也

宋書殷景仁傳景仁代義康爲揚州刺史僕射領吏部如故遣使者授印綬主簿代拜拜畢便覺其情理乖錯性本寬厚而忽更苛暴問左右曰今年男婚多



女嫁多是冬大雪景仁乘輿出聽事觀望忽驚曰當  
問何得有大樹旣而曰我誤邪疾篤太祖謂不利在  
州司使還住僕射下省爲州凡月餘卒

文帝本紀元嘉十四年冬十二月辛酉停賀雪

符瑞志孝武大明五年正月戊午元日花雪降殿庭  
時右衛將軍謝莊下殿雪集衣還白上以爲瑞於是  
公卿並作花雪詩史臣按詩曰先集爲霰韓詩曰霰  
英也花葉謂之英離騷云秋菊之落英左思云落英  
飄飄是也然則霰爲花雪矣草木花多五出花雪獨

六出

朱百年傳朱百年會稽山陰人也祖愷之晉右衛將  
軍父濤揚州主簿百年少有高情親亡服闋攜妻孔  
氏入會稽南山以伐樵採箬爲業以樵箬置道頭輒  
爲行人所取明日亦復如此人稍怪之積久方知是  
朱隱士所賣須者隨其所堪多少留錢取樵箬而去  
或遇寒雪樵箬不售無以自資輒自榜船送妻還孔  
氏天晴復迎之

齊春秋江革補國子生王融謝朓嘗行還過候革時



大寒雪見革弊絮單席而耽學不倦嗟嘆久之  
梁書昭明太子傳太子每霖雨積雪遣腹心左右周  
行閭巷視貧困家有流離道路密加振賜又出主衣  
綿帛多作襦袴冬月以施貧凍  
南史梁南平王偉傳偉每祁寒積雪則遣人載樵米  
隨乏絕者賦給之

梁邵陵王綸傳綸將攻竟陵魏遣楊忠侯幾通攻破  
城執綸綸不屈通殺之投于江岸經日色不變鳥獸  
莫敢近時飛雪飄零屍橫道路周迴數步獨不霑灑

舊主帥安陸人郝破敵斂之於襄陽葬之日黃雪雰  
糝唯冢壙所獨不下雪楊忠知而悔焉使以太牢往  
祭殯焉百姓憐之爲立祠廟

銷夏庾肩吾少事陶先生頗多藝術嘗夏會客向室  
大噓氣盡成雪

魏書蠕蠕傳大檀率衆南徙犯塞太宗親討之大檀  
懼而遁走遣山陽侯奚斤等追之遇寒雪士衆凍死  
墮指者十二三

樓伏連傳樓毅除使持節鎮東將軍定州刺史時太



古今圖書集成  
極殿成將行考室之禮引集羣臣而雪不克饗高祖  
曰朕經始正殿功構初成將集百寮考行大禮然同  
雲仍結霏雪驟零將由寡昧未能仰答天心此之不  
德咎竟焉在卿等宜各陳所懷以匡不逮毅稽首對  
曰雪霜風雨天地之常夏霖冬霰四時恆節今隆冬  
雪降固是其時又禮云雨沾服失容則廢禮自古而  
然不足爲異高祖曰昔劉秀將濟滹沱爲之冰合但  
朕德謝古人不能仰感天意故也

馮亮傳亮隱居嵩高高延昌二年卒初亮以盛冬喪時

連日驟雪窮山荒澗鳥獸飢窘僵尸山野無所防護  
時壽春道人惠需每日旦往看其屍拂去塵霰禽蟲之  
迹交橫左右而初無侵毀

西域傳鉢和國在渴槃陀西其土尤寒人畜同居穴  
地而處又有大雪山望若銀峯

波知國有三池傳云大池有龍王次者有龍婦小者  
有龍子行人經之設祭乃得過不祭多遇風雪之困  
北齊書投韶傳周武帝遣將率羌夷與突厥合衆逼  
晉陽世祖自鄴倍道兼行赴救突厥從北結陣而前



古今圖書集成  
東距汾河西被風谷時事既倉卒兵馬未整世祖見如此亦欲避之而東尋納河間王孝琬之請令趙郡王盡護諸將時大雪之後周人以步卒爲前鋒從西山而下去城二里諸將咸欲逆擊之韶曰步人氣勢自有限今積雪既厚逆戰非便不如陣以待之彼勞我逸破之必矣既而交戰大破之敵前鋒盡殪無復孑遺其餘通宵奔遁仍令韶率騎追之出塞不及而還

糝樓記北齊盧士琛妻崔氏有才學春日以桃花和

雪與兒頤面云取白雪與兒洗面作光悅取紅花與兒洗面作妍華

北周書明帝本紀二年二月詔自元年以來有被掠入賊者悉可放免自冬不雨至於是月方大雪

長孫儉傳儉鎮江陵進爵昌寧公遷大將軍移鎮荊州總管五十二州舊嘗詣闕奏事時值大雪遂立于雪中待報自旦達暮竟無惰容其奉公勤至皆此類也

龍城錄隋開皇中趙師雄遷羅浮一日天寒日暮于



古今圖書集成  
酒肆旁舍見美人淡粧出迎時殘雪未消與之共飲  
師雄醉寢起視乃在大梅樹下

辟寒隋末長安禁苑內一大樹冬月雪中忽花葉茂  
盛及雕謝結實其子光明燦爛如火之明數日皆化  
爲紅蛺蝶飛去

唐書回紇傳薛延陀使大度設擊李思摩摩走朔州  
太宗詔李勣營朔州部將薛萬徹率勁騎先收執馬  
者故薛延陀不能去斬首數千級獲馬萬五千大度  
設亡去萬徹追弗及殘卒奔漠北會雪甚衆皸踣死

者十八始薛延陀能以術禳神致雪冀困勣師及是  
反自斃云

唐書蘇烈傳烈字定方賀魯獨與處木昆屈律啜數  
百騎西走定方令副將蕭嗣業回紇婆潤率雜鹵兵  
趨邪羅斯川追北定方與雅相領新附兵絕其後會  
大雪吏請少休定方曰鹵恃雪方止舍謂我不能進  
若縱使遠遁則莫能禽遂勒兵進定方爲遼東道行  
軍大總管俄徙平壤破高麗之衆於浪江奪馬邑山  
爲營遂圍平壤會大雪解圍還拜涼州安集大使



冊府元龜麟德二年封禪十一月丁酉至平陰頓是日降雪帝賦詩皇后和

唐會要長壽二年元日大雪質明而晴上謂侍臣俗云元日有雪則百穀豐文昌左丞姚壽對曰汜勝之書云雪爲五穀之精以其汁和種則年穀大穰又宋武大明五年元日降雪以爲嘉瑞上曰朕臨御萬方心存百姓如得年登歲稔即可爲大瑞雖獲麟鳳亦何用焉

唐書郭震傳神龍中遷左驍衛將軍安西大都護西

突厥酋烏質勒部落盛彊款塞願和元振卽牙帳與計事會大雨雪元振立不動至夕凍冽烏質勒已老數拜伏不勝寒會罷卽死其子娑葛以元振計殺其父謀勒兵襲擊副使解琬知之勸元振夜遁元振堅臥營爲不疑者明日素服往弔道逢娑葛兵不意元振來遂不敢逼揚言迎衛進至其帳脩弔贈禮哭甚哀爲畱數十日助喪事娑葛感義更遣使獻馬五千駝二百牛羊十餘萬

全唐詩話清暉閣登高遇雪宗楚客詩云蓬萊雪作



古今圖書集成  
山是也因賜金綵人勝李嶠等七言詩千鍾聖酒御筵披是也是日甚歡

畫鑒王右丞維平生喜作雪景劔閣棧道螺岡曉行捕魚雪灘村墟等圖

唐書明崇儼傳崇儼以奇技自名盛夏高宗思雪崇儼坐頃取以進自云往陰山取之

王峻傳開元時峻將并州兵濟河以討叛賊峻間行卷甲捨幕趨山谷夜遇雪恐失期誓于神曰峻事君不以忠不討有罪天所殛者當自蒙罰士衆無罪心

誠忠而天監之則止雪反風以獎成功俄而和霽峻追及之獲級三千

蕭至忠傳蕭至忠沂州丞人祖德言爲祕書少監至忠少與友期諸路會雨雪人引避至忠曰寧有與人期可以失信卒友至乃去衆嘆服

幽怪錄晉州刺史蕭至忠將以臘日出獵前一日有樵者見禽獸百許祈于元冥使者使者令老麋祈于東谷巖四巖四曰若令滕六降雪與一起風不復遊獵矣天未明忽風雪大作刺史不復出也



古今圖書集成  
摭異記狄仁傑之爲相也有盧氏堂姨居于午橋南別墅姨止有一子而未嘗來都城親戚家梁公每遇伏臘晦朔修禮甚謹嘗經甚雪多休暇因候盧姨安否適見表弟顧揖梁公意甚輕簡公因啓姨曰某今爲相表弟有何樂從姨曰有一子不欲令其事女主公大慙而退

開元天寶遺事冬至日大雪至午雪霽有晴色因寒所結簷溜皆爲冰條妃子使侍兒敲下二條看玩帝自晚朝視政回問妃子曰所玩何物耶妃子笑而答

曰妾所玩者冰筋也帝謂左右曰妃子聰惠比象可愛也

巨豪王元寶每至冬月大雪之際令僕夫自本家坊巷口掃雪爲徑路躬親立於坊巷前迎揖賓客就本家具酒炙宴樂之爲暖寒之會

前定錄喬琳以天寶元年冬自太原赴舉至大梁舍於逆旅時天寒雪甚琳馬死傭僕皆去聞浚儀尉劉彥莊喜賓客遂往告之

集異記開元中詩人王昌齡高適王渙之齊名時風



古今圖書集成  
塵未偶而遊處略同一日天寒微雪三詩人共詣旗亭貰酒小飲忽有梨園伶官十數人登樓會譙三詩人因避席隈映擁爐火以觀俄有妙妓四輩尋續而至奢華艷曳都冶頗極旋則奏樂皆當時之名部也昌齡等私相約曰我輩各擅詩名每不自定其甲乙今者可密觀諸伶所謳若詩入歌詞之多者則爲優矣俄而一伶拊節而唱乃曰寒雨連江夜入吳平明送客楚山孤洛陽親友如相問一片冰心在玉壺昌齡則引手畫壁曰一絕句尋又一伶謳之曰開篋淚

霑臆見君前日書夜臺何寂寞猶是子雲居適則引手畫壁曰一絕句尋又一伶謳曰奉帚平明金殿開彊將團扇共徘徊玉顏不及寒鴉色猶帶昭陽日影來昌齡則又引手畫壁曰二絕句渙之自以詩名已久因謂諸人曰此輩皆潦倒樂官所唱皆巴人下里之詞耳豈陽春白雪之曲俗物敢近哉因指諸妓之中最佳者曰待此子所唱如非我詩吾卽不敢與子爭衡矣脫是吾詩子等當須列拜牀下奉吾爲師因歡笑而俟之須臾次至雙鬟發聲則曰黃沙遠上白



古今圖書集成  
雲間一片孤城萬仞山羌笛何須怨楊柳春光不度  
玉門關渙之卽撇歛二子曰田舍奴我豈妄哉因大  
諧笑諸伶不喻其故皆起詣曰不知諸郎君何此歡  
噱昌齡等因話其事諸伶競拜曰俗眼不識神仙乞  
降清重俯就筵席三子從之飲醉竟日  
開元天寶遺事申王每至冬月有風雪苦寒之際使  
宮妓密圍於坐側以禦寒氣自呼爲妓圍  
瑯嬛記雷威遇大風雪中獨往峩峩酣飲著蓑笠入  
深松中聽其聲連延悠颺者伐之斲以爲琴妙過于

桐有最愛重者以松雪名之

酉陽雜俎蜀有道士陽狂俗號爲灰袋翟天師晚年  
弟子也翟每戒其徒勿欺此人吾不及之常大雪中  
衣布褐入青城山暮投蘭若求僧寄宿僧曰貧僧一  
衲而已天寒如此恐不能相活但言容一牀足矣至  
夜半雪深風起僧慮道者已死就視之去牀數尺氣  
蒸如炊流汗袒寢僧知其異人未明不辭而去  
原化記大曆初鍾陵崔希真工繪事冬日晨出見一  
老人避雪門下延入具一麥麵食之又獻松花酒老



古今圖書集成  
人懷中取一九藥置酒中酒頓甘美仍以數丸遺崔  
崔入宅復出見老人已去有圖于所畫素上者皆非  
常意所及遂踏雪尋至蘆洲中見船中數人而樵客  
在側顧笑曰葛三乃見逼于伊人李極光天師云此  
真人葛洪第三子所畫也其藥乃千歲松膠也

酉陽雜俎韋斌雖生于貴門而性頗厚質然其地望  
素高冠冕特盛雖門風稍奢而斌立朝侃侃容止尊  
嚴有大臣之體每會朝未常與同列笑語舊制羣臣  
立於殿庭既而遇雨雪亦不移步于廊下忽一日密

雪驟降自二事以下莫不振其簪裾或更其立位獨  
斌意色益恭俄雪甚至膝朝既罷斌于雪中拔身而  
去見之者咸嘆重焉

貞元二年長安大雪平地深尺餘雪上有薰黑色  
龍城錄君誨嘗夜坐與退之余三人談鬼神變化時  
風雪寒甚窗外點點火明若流螢須臾千萬點不可  
數度

唐書劉叉傳劉叉者亦一節士少放肆爲俠行因酒  
殺人亡命會赦出更折節讀書能爲歌詩然恃故時



所負不能俛仰貴人常穿屐破衣聞韓愈接天下士  
步歸之作冰柱雪車二詩出盧仝孟郊右  
青瑣高議柳宗元答韋中立師道書僕往聞庸蜀之  
南恆雨少日日出則犬吠余以爲過言前六七年僕  
來南二年冬幸大雪踰嶺被南越中數州數州之犬  
皆蒼黃吠噬狂走者累日至無雪乃已然後始信前  
所聞者

唐書李愬傳吳元濟悉銳卒屯洄曲以抗李光顏愬  
知其隙可乘乃遣從事鄭澥見裴度告師期于時元

和十一年十月己卯師夜起李祐以突將三千爲前  
鋒李忠義副之愬率中軍三千田進誠以下軍殿出  
文城柵令曰引而東六十里止襲張柴殲其戍救士  
少休益治鞍鎧發刃彀弓會大雨雪天晦凜風偃旗  
裂膚馬皆縮慄士抱戈凍死於道十一二張柴之東  
陂澤阻奧衆未嘗蹈也皆謂投不測始發吏請所向  
愬曰入蔡州取吳元濟士失色監軍使者泣曰果落  
祐計然業從愬人人不敢自爲計愬道分輕兵斷橋  
以絕洄曲道又以兵絕朗山道行七十里夜半至懸



古今圖書集成  
瓠城雪甚城旁皆鵝鶩池愬令擊之以亂軍聲賊恃  
吳房朗山戍晏然無知者祐等次塘先登衆從之殺  
門者發關留持柝傳夜自如黎明雪止愬入駐元濟  
外宅蔡吏驚曰城陷矣元濟尚不信曰是洄曲子弟  
來索褚衣爾及聞號令曰常侍傳語始驚曰何常侍  
得至此率左右登牙城田進誠兵薄之愬計元濟且  
望救于董重質乃訪其家慰安之使無怖以書召重  
質重質以單騎白衣降愬待以禮進城火南門元濟  
請罪梯而下檻送京師申光諸屯尚二萬衆皆降

北夢瑣言唐高相國崇文本薊州將校也因討劉闢  
有功授西川節度使一旦大雪諸從事吟賞有詩渤  
海鄙言多呼人爲髀兒此日筵上謂賓客曰某雖武  
夫亦有一詩乃口劄云崇文崇武不崇文提戈出塞  
號將軍那個髀兒射鴈落白毛空裏落紛紛

唐會要元和二年正月辛卯郊饗獻之次景物澄霽  
及鑾輿就次則微雪大駕將動則又止翌日御樓宣  
赦畢瑞雪盈尺

唐書陳楚傳元和末義武節度使渾鎬喪師定州亂



古今圖書集成  
拜楚爲節度使馳傳赴軍及郊無迎者左右勸無入  
楚曰定軍不來迎以試我今不入正墮計中乃冒雪  
行四十里夜入其州然軍校部伍皆楚舊也由是衆  
心乃定

田布傳朱克融據幽州與王廷湊脣齒河朔三鎮舊  
連衡桀驁自私而憲誠畜異志陰欲乘釁又魏軍驕  
憚格戰會大雪師寒糧乏軍中謗言他日用兵團粒  
米盡仰朝廷今六州刮肉與鎮冀角死生雖尙書瘠  
已肥國魏人何罪憲誠得間因以搖亂

雲溪友議陸郎中暢蚤耀才名輦轂不改於鄉音自  
賀祕書知章賈相耽顧著作况譏調秦人至于陸君  
者也貢舉之年和羣公對雪落句云天人寧底巧剪  
水作飛花

全唐詩話李紳鎮揚州請章孝標賦春雪詩命題于  
臺盤上孝標唯然索筆一揮云六出飛花處處飄粘  
窗拂砌上寒條朱門到晚難盈尺盡是三軍喜氣銷  
閣濟美自江東繼薦就試東都張謂主文襍文已過  
繼欲帖經濟美辭以不能謂曰禮闈故事亦許作詩



古今圖書集成  
續帖遂命天津橋望洛城殘雪題濟美曰新霽洛城  
端千家積雪寒未收清禁色偏向上陽殘謂一覽稱  
賞

玉泉子宣宗在藩邸嘗從駕迴而誤墜馬人不之覺  
比二更方能興時天大雪四顧悄無人聲上寒甚巡  
警吏至大驚上曰我光王也不虞至此方困且渴若  
爲我求水警者卽于旁近得水以進遂委而去良久  
起舉甌將飲顧視甌中水盡爲芳醪矣上獨喜自負  
一舉甌而體已微煖有力步歸藩邸後卽帝位

因話錄大中七年冬詔來年正月一日御舍元殿受  
朝賀趙璘請御宣政殿疏奏上曰關輔久無雨雪朕  
之憂焉權御宣政亦何不可也

劇談錄大中年韋顥舉進士詞學優贍而貧窶滋甚  
歲暮飢寒無以自給有韋光者待以宗黨輟居所外  
舍館之放榜之夕風雪凝互報光成名者絡繹而至  
顥略無登第之耗光延之於堂際小閣備設肴饌慰  
安之見光婢妾羅列衣裝僕者排比鞍馬顥夜分歸  
于所止擁爐而坐愁嘆無已候光成名將修賀禮寢



榻迫于壞牖以橫竹掛席蔽之簷際忽有鳴梟頃之  
集于竹上顓神魄驚駭杖策出戶逐之飛起復還久  
而方去謂僕者曰我失意亦無所恨妖禽作妖如此  
兼恐橫罹災患俄而禁鼓忽鳴榜到顓已登第光之  
服用車馬悉皆遺焉世以鵬至梟鳴不祥之兆近觀  
數事亦不然乎

雲笈七籤會稽崔希真嚴冬之日有負薪老叟立門  
外雪中崔凌晨見之有傷憫之色揖問之叟去笠與  
語顧其狀貌不常乃問其姓氏云某姓葛第三崔延

坐崔曰雪寒既甚作大麥湯餅可乎叟曰大麥四時  
烝足食之益人勿以豉不利中府崔然之自促令備  
饌食畢而去

唐書本紀唐懿宗初封鄆王嘗大雪數尺而帝寢室  
之上獨無人皆異之

太平廣記唐咸通壬辰歲冬十一月王知古嘗晨興  
僦舍無烟愁雲塞望悄然弗怡乃徒步造張直方第  
至則直方急趨將出畋也謂知古曰能相從乎而知  
古以祁寒有難色直方顧巾僮曰取短阜袍來請知



古衣之知古乃上加麻衣焉遂聯轡而去出長夏門則微霰初零由闕塞而密雪如注乃渡伊水而東南踐萬安山之陰麓而鞞弋之獲甚夥傾羽觴燒兔肩殊不覺有嚴冬意及霰開雪霽日將夕焉忽有封狐突起於知古馬首乘酒馳之數里不能及又與獵徒相失須臾雀噪煙暝莫知所如隱隱聞洛城暮鐘但彷徨於樵徑古陌之上俄而山川暗然若一鼓將半長望間有炬火甚明乃依積雪光而赴之復若十餘里至則喬林交柯而朱門中開皓壁橫互真北闕之

甲第也

北夢瑣言唐相國鄭棨有詩名或曰相國近有新詩否對曰詩思在灞橋風雪中驢子上此處何以得之蓋言平生苦心也

雲仙雜記羣公對雪尚隆之曰麵堆金井誰調湯餅吳末素曰玉滿天山難刻珮環坐間服其韻精

雲笈七籤邊洞元者范陽人女也幼而高潔敏慧仁慈好善見微物之命有危急者必俯而救之救未獲之間忘其飢渴每霜雪凝沍鳥雀飢棲必求米穀粒



古今圖書集成

食以散喂之

于闐傳仲雲者小月支之遺種也其人勇而好戰瓜沙之人莫不憚之胡盧磧漢明帝征匈奴屯田於吾盧蓋其地也地無水而常寒多雪每天暖雪銷乃得水

辟寒譚景升冬則綠布衫或臥于風雪霜中經日謂已斃視之氣休休然父常念之每遣家僮訪尋春冬必寄之衣及錢帛景升捧之且喜復書遽遣家僮乃厚遺之纔去便以所寄衣出街路見貧寒者與之及

寄于酒家一無所留

唐國史補澠池道中有車載瓦甕塞于隘路屬天寒冰雪峻滑進退不得日向莫官私客旅羣隊鈴鐸數千羅擁在後無可奈何有客劉頗者揚鞭而至問曰車中甕直幾錢答曰七八千頗遂開囊取縑立償之命僮僕登車斷其結絡悉推甕于崖下須臾車輕得進羣噪而前

辟寒藍采和常衣破藍衫六鈐黑木腰帶一脚著靴一脚跣冬則臥雪中氣出如蒸



唐闕史都下大雪中書舍人路羣方於南垣茅亭鹿巾鶴氅搆火命觴以賞佳致

退朝錄唐在京文武官每月朔望日朝若雨雪霑服失容及泥潦並停

雲笈七籤杜昇冬臥于雪中三兩日人以爲殭斃矣或撥看之徐起抖擻雪而行猶若醺酣氣出如夏醉睡醒也

五代史梁臣朱珍傳太祖與晉王東逐黃巢還過汴館之上源驛太祖使珍夜以兵攻之晉王亡去珍悉

殺其麾下兵義成軍亂逐安師儒師儒奔梁太祖遣珍以兵趨滑州道遇大雪珍趣兵疾馳一夕至城下遂乘其城義成軍以爲方雪不意梁兵來不爲備遂下之

張策傳策召拜廣文館博士邠州王行瑜辟觀察支使晉王李克用攻行瑜策與婢肩輿其母東歸行積雪中行者憐之

唐家人傳同光三年秋大水兩河之民流徙道路莊宗方與后荒于畋遊十二月己卯獵于白沙是時大



雪軍士寒凍金槍衛兵萬騎所至責民供給縣吏亾竄

唐明宗本紀歲嘗旱已而雪暴出庭中詔武德司宮中無得掃雪曰此天所以賜我也

冊府元龜裴彥稠長興中與康福率師自井兒族入白魚谷追及皆叛黨項白馬盧家六旅客戶三族獲大首領連李八薩王都統悉那埋摩侍御乞埋崑悉逋等六十人兼黨類二千餘人獲駝馬牛羊數千計至晚師還野次其地無水軍士方渴俄有風雨自東

立起是夜初更降雪二尺軍中以為神助

五代史康福傳福拜涼州刺史河西軍節度使入見

明宗涕泣言為重誨所擠明宗召重誨為福更他鎮

重誨曰福為刺史無功效而建節旄其敢有所擇邪

明宗怒謂福曰重誨遣汝非吾意也吾當遣兵護汝

可無憂乃令將軍牛知柔以兵衛福行至方渠而羌

夷果出邀福福以兵擊走之至青岡峽遇雪福登山

望見川谷中烟火有吐蕃數千帳不覺福之至福分

其兵為三道出其不意襲之吐蕃大駭棄車帳而走



殺之殆盡獲其玉璞綾錦羊馬甚衆由是威聲大振  
晉家人高祖皇后李氏傳開運四年正月丁亥朔耶  
律德光入京師帝與太后肩輿至郊外館于封禪寺  
遣其將崔廷勳以兵守之其時雨雪寒凍皆苦饑寺  
僧不敢獻食帝陰祈守者乃稍得食

五代史補李昇旣蕃異志欲有江南且欲諷動僚屬  
雪天大會出一令曰借雪取古人名仍詞理貫通時  
宋齊丘徐融在座昇舉杯爲令曰雪下紛紛便是白  
起齊丘曰著屐過街必須雍齒融意欲挫昇等遽曰

明朝日出爭奈蕭何昇大怒是夜收融投於江自是  
與謀者惟齊丘而已

江表志保大五年元日大雪上詔大弟以下登樓展  
宴咸命賦詩令中使就私第賜李建勳建勳方會中  
書舍人徐鉉勤政殿學士張義方於溪亭卽時和進  
元宗乃召建勳鉉義方同入夜艾方散侍臣皆有興  
詠徐鉉爲前後序大弟合爲一圖集名公圖繪曲盡  
一時之妙御容高冲古主之大弟以下侍臣法部絲  
竹周文矩主之樓閣宮殿朱澄主之雪竹寒林董元



主之池沼禽魚徐崇嗣主之圖成無非絕筆侍宴詩  
纔記數篇而御詩云珠簾高捲莫輕遮往往相逢隔  
歲華春氣昨朝飄律管東風今日散梅花素姿好把  
芳姿比落勢還同無勢斜坐有賓朋樽有酒可憐情  
味屬儂家建勳詩云紛紛忽降當元會著物輕明似  
月華狂灑玉墀初放杖密粘宮樹未妨花迴封雙闕  
千尋峭冷壓南山萬仞斜寧意晚來中使出御題宣  
賜老僧家鉉詩曰一宿東林正氣和便隨仙杖放春  
華散飄白獸惟分影輕綴青旂始見花落砌更依宮

舞轉入樓偏向御衣斜嚴徐幸待金門詔願布堯言  
賀萬家義方詩曰恰當歲日紛紛落天贊瑤華助物  
華自古最先標瑞牒有誰輕擬比楊花密飄粉署光  
同冷靜壓庭枝勢欲斜豈但小臣添興詠狂歌醉舞  
一千家

陸游南唐書後主昭惠國后周氏傳后嘗雪夜酣燕  
舉杯請後主起舞後主曰汝能創爲新聲則可矣后  
卽命牋綴譜喉無滯音筆無停思俄頃譜成所謂醉  
邀舞破也



辟寒潘辰泊舟秦淮有老父求同載辰許之時大雪  
老父髻中取小葫蘆飲之極飲不竭

遼史太祖本紀神冊四年九月征烏古部道聞皇太  
后不豫一日馳六百里還侍太后病間復還軍中冬  
十月丙午次烏古部天大風雪兵不能進上禱於天  
俄頃而霽命皇太子將先鋒軍進擊破之

耶律幹特刺傳北阻卜酋長磨古斯叛幹特刺率兵  
進討會天大雪敗磨古斯四別部斬首千餘級拜西  
北路招討使封漆水郡王

續夷堅志虞令公仲文質夫四歲賦雪花詩云瓊英  
與玉蕊片片落堦墀問著花來處東君也不知仕爲  
遼相歸朝授平章政事濮國公



Blank columns for text within a rectangular frame.





